

Uunga siunnersuut: Akileraaruserinermik ingerlatsineq pillugu Inatsisartut inatsisaata nr. 11, 2. november 2006-imeersup allanngortinneqarneranik Inatsisartut inatsisaat nr. xx, xx. xxx 2017-imeersoq

(Akileraaruseriffiup aamma Naalakkersuisut oqartussaaffiinik agguataarineq il.il.)
(*Aningaasaqarnermut Akileraartarnermullu Naalakkersuisoq*)

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Jens Immanuelson, Siumut, siulittaasoq
Inatsisartunut ilaasortaq Randi V. Evaldsen, Demokraatit, siulittaasup tullia
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Bendt Kristiansen, Inuit Ataqatigiit
Inatsisartunut ilaasortaq Martha Lund Olsen, Siumut
Inatsisartunut ilaasortaq Ineqi Kielsen, Siumut
Inatsisartunut ilaasortaq Kelly Berthelsen, Inuit Ataqatigiit

Ulloq 25. april 2017-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Siunnersuut aqqutigalugu Naalakkersuisut akiligassiissutit pillugit piumasaqaatinik aalajangersaasinnaangorput. Kiisalu siunnersuut aqqutigalugu naammagittaalliorfissat killilerneqar-nissaannut maleruagassat atuutsinneqalerput. Tamatuma saniatigut aningaaserivinni soraar-nerussutisiassanut ileqqaaruteqarnissap periarfissaalernerata kingunerisaanik allannguutini-k kiisalu 2006-imi inatsimmik allannguinnermi oqaasertat allanngortinneqarnerannik aalajanger-sakkamullu kukkusumut innersuussinnerup iluarsineqarneranik siunnersuut imaqarpoq.

Ilaatigut naatsorsuuserinermi pitsaassutsip annertusarneqarnissaa siunertaralugu akileraaruse-rinermik ingerlatsineq pillugu inatsisip ullutsinnut naleqqussarneqarlunilu nutarterneqar-nissaanik kissaateqarneq, elektroniskiusumik akiligassiisalernissamut ikaarsaariarneq maanna ingerlanneqartoq eqqarsaatigalugu pisariaqartutut isigineqartoq, ilaatigullu naammagittaalliu-tinik akileraartarnermut tunngasunik suliarinninnermi nukissat pisortanit ator-neqartut ator-

luarneqarnerunissaasa qulakkeerneqarnissaanik kissaateqarneq inatsisissatut siunnersuuteqarnermi tunngaviupput.

2. Siunnersuutip Inatsisartunit siullermeerneqarnera

Siunnersuut siullermeerneqarami akuersaarneqarluarpoq. Siunnersuut nalinginnaasumik taparserneqarpoq.

3. Tusarniaanermut akissutit

Inatsisissatut siunnersuut piffissami 16. januar 2017-imiit 15. februar 2017-imut ukununga tusarniaassutigineqarpoq: Sulisitsisut (GE), NUSUKA, SIK, KANUKOKA, Kommuneqarfik Sermersooq, Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik, Aatsitassanut Naalakkersuisoqarfik, Naalakkersuisut Siulittaasuata Naalakkersuisoqarfia, Deloitte, Grønlands Revisionskontor, BK Revision, EY Grønland, GrønlandsBANKEN aamma BankNordik.

Inatsisissatut siunnersuut aammattaaq tusarniaavimmi uani tamanut saqqummiunneqarpoq: www.naalakkersuisut.gl.

Tusarniaanermut akissuteqarnissamut piffissaliussap qaangiunnerani akissutisiffigineqarput uku: GrønlandsBANKEN, BankNordik, KANUKOKA, Sulisitsisut (GE), Sulineramik Inuussutissarsiuteqartut Kattuffiat (SIK) aamma Aatsitassanut Ikummatissanullu Naalakkersuisoqarfik.

Inatsisit nunatsinni aningaasaqarnermut taama pingaaruteqartigisut suliarineqarnerannut atatillugu tusarniaanermut piffissaliussat nalinginnaasut eqquutsinneqartarnissaat Aningaasaqarnermut Akileraartarnermullu Ataatsimiititaliamit kaammattuutigineqassaaq.

4. Ataatsimiititaliap siunnersuummik suliarinninnera

Siunnersuut aqputigalugu Naalakkersuisut akiligassiisutit pillugit piumasaqaatinik aalajangersaasinnaangorput. Inatsisissatut siunnersuummi aalajangersakkanut ataasiakkaanut nassuiaatini siunnersuuteqartoq allappoq:

”Aalajangersagaq Naalakkersuisut, akiligassat allagartaannik suliaqartarnissaq aamma akiligassat allagartaannik suliaqartussaataaneq pillugit maleruagassiorsinnaanerannik tunngavissiivoq, matumani aamma ilanngullugu akileraaruseriffiup akileraarutitigut ilanngaateqarnissamik itigartitsisinnaanera pillugu aalajangersagalior-nissamut, tassa akiligassat allagartaannik suliaqartarnissamik piumasaqaatinik mallinnikkumanninneq nammineerluni nalunaarsuiffimmi nalunaarsukkat naammattumik uppernarsarneqannginnerannik kinguneqartutut isigineqarpat.”

Naatsorsuuserinermi pitsaassutsip annertusarneqarnissaa siunertaralugu akileraaruserinermik ingerlatsineq pillugu inatsisip ullutsinnut naleqqussarneqarlunilu nutarterneqarnissaanik kis-

saateqarnerup inatsisissatut siunnersuuteqarnermi tunngaviuneranik Naalakkersuisut oqarnerat Aningaasaqarnermut Akileraartarnermullu Ataatsimiititaliamit tusaatissatut tiguneqarput. Pingaartumik elektroniskiusumik akiligassiisalernissamut ikaarsaariarneq maanna ingerlanneqartoq eqqarsaatigalugu nutarterinissap naleqqussaanissallu pisariaqarnerat Naalakkersuisunit oqaatigineqarmat ataatsimiititaliamit tassunga ilanngullugu maluginiarneqarpoq. Taamaaliornikkut nammineerluni nalunaarsuiffimmi nalunaarsukkat naammattumik uppersaaserneqarsimanerannik naliliinissamut Akileraartarnermut Aqutsisoqarfik sakkussagissaarnerulissasoq Aningaasaqarnermut Akileraartarnermullu Ataatsimiititaliamit paasineqarpoq. Tassunga atatillugu isertitat akileraaruserneqartussat nalunaarutigineqartut aamma taamatut naliliiffigineqartariaqartutut ataatsimiititaliamit erseqqissumik isumaqarfigineqarnerat Aningaasaqarnermut Akileraartarnermullu Ataatsimiititaliamit erseqqissaatigineqassaaq.

Akiligassiissutit akiligassiisussaatitaanerlu pillugit erseqqissunik maleruagassaqaarnissaq Aningaasaqarnermut Akileraartarnermullu Ataatsimiititaliamit pissusissamisoortutut isigineqarpoq. Aningaasaqarnermut Akileraartarnermullu Ataatsimiititaliap paasinninnera malillugu akiligassiissutit tassaavoq tunisisup akiligassiissutiminut uppersaataa nioqquutissamut sullississummullu tunniunneqartumut akileeqqusissutitut tunisisumit pisisumillu isigineqartoq. Taamaattumillu isertitatut aningaasartuutitullu naatsorsuutini allassimasunut uppersaatisatut naleqquppoq – tassungalu aamma ilanngullugit akileraarutitut naatsorsuutit. Taamaattumillu akiligassiissutit sunik imaqaarnissaannik aammalu akiligassiissutini elektroniskiusuni paasissutissat nalinginnaasumik akiligassiissutini paasissutissat assigissagaat erseqqissunik piumasaqaateqartoqartariaqartoq Aningaasaqarnermut Akileraartarnermullu Ataatsimiititaliap isumaqarpoq. Akiligassiissutilli elektroniskiusut pillugit maleruagassanik immikkut ittunik aalajangersaanissap pisariaqarneranik siunnersuuteqartup oqarnera Aningaasaqarnermut Akileraartarnermullu Ataatsimiititaliamit isumaqatigineqarpoq.

Akiligassiissutit pillugit maleruagassat allanngortinneqaarnissaannik siunnersuutip siuliani nasuiaatigineqartup saniatigut ilaatigut naammagittaalliorsinnaanermut killiliussat pillugit maleruagassanik atuutsitsilernissaq kiisalu soraarninngornissamut aningaaserivinni ileqqaagaqarsinnalernerup nassatarisaanik allannguinnissaq siunnersuutigineqarput. Taakkununga ataatsimiititaliap allanik oqaaseqaatissaqaanngilaq.

5. Siunnersuutip aningaasaqarnikkut kingunerisassai

Qulequtaq matumani pineqartoq pillugu siuliani oqaaseqaatini Aningaasaqarnermut Akileraartarnermullu Ataatsimiititaliap innersuussutigissavai aammalu siunnersuutip aningaasaqarnikkut allaffissornikkullu kingunerisassai pillugit siunnersuuteqartup naatsorsuutigisaanut annertunerusumik oqaaseqaatissaqarani.

6. Ataatsimiititaliap inassuteqaatai

Tamanna tunngavigalugu siunnersuut akuerineqassasoq **ataatsimiititaliap isumaqatigiittup** inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Jens Immanuelson,
siulittaasoq




Randi V. Evaldsen




Peter Olsen



Bendt B. Kristiansen



Martha Lund Olsen



Ineqi Kielsen



Kelly Berthelsen